

# L'iniziativa renta la banca naziunala vi da chadainas d'aur

La chombra pitschna refusa l'iniziativa d'aur

■ **(anr/vi) La chombra pitschna propo-  
na al pievel da refusar l'iniziativa  
d'aur. Gnanc in sulet cusseglier è  
s'exprimi ier per l'iniziativa che de-  
riva or dal ravugl da la pps. Perquai  
n'hai er betg duvrà ina votaziun.** Nua  
sa chatta l'aur da la Banca naziunala in-  
summa? Quai n'era betg cler, cura  
ch'ins ha lantschè l'iniziativa «Salvai  
noss aur svizzer». Ina gronda part da  
l'aur sa chattia en ils tschalers da Fort  
Knox en ils Stadis Unids, vegniva spe-  
culà. En ils egls dals iniziants fuvà l'aur  
là betg segir en vista a las charplinas  
tranter bancas svizras ed il fiscus ame-  
rican.

En il fratemp ha la Banca naziunala  
dà scleriment: 30 pertschient da l'aur  
sa chattan en l'exteriur, numnadamain  
a Canada ed en la Gronda Britannia.  
70 pertschient da l'aur vegnan magasi-  
nads en tresors svizzers. Ina finamira  
dals iniziants fiss damai cuntanschida.

## **Enchadenar cun aur**

L'iniziativa pretenda en pli: Las reser-  
vas d'aur na dastgan betg vegnir vendi-  
das e la Banca naziunala sto avair al-  
main 20 pertschient da sias activas en  
furma d'aur. L'emprim mument per-  
svadian las pretaisas, ha ditg *Anita Fetz*  
(sp/BS) ier durant la debatta. Ma l'ini-  
ziativa rentass la Banca naziunala vi da  
chadainas d'aur.

L'aur muntia gea ina reserva per  
temps da crisa, ha ditg *Karin Keller Sut-*

*ter* (pld/SG). «Ma tge gidan reservas,  
sch'ins na las dastga betg duvrar?» Per  
spendrar l'UBS haja la Banca naziunala  
stuì scuflar si per curt temp sia bilan-  
tscha. Cun l'iniziativa avess ella anc  
stuì augmentar considerablamain sias  
reservas d'aur. Ina tala acziun fiss  
strusch pli stada pussaivla.

## **Pussaivladads d'agir limitadas**

Las pussaivladads d'agir da la Banca  
naziunala vegnissan limitadas ferma-  
main cun l'iniziativa d'aur, è stà il tenor  
unanim en il cussegl dals chantuns. La  
Banca naziunala haja l'incumbensa da  
perseguir ina politica monetara che sta-  
biliseschia il pretsch e porschia in svi-  
lup economic gultiv. Quest pensum ha-  
ja la banca adempli bain fin uss – gist  
era cun sustegnair il franc entras ina li-  
mita per l'euro. Talas intervenziuns fis-  
san cumbinadas cun immensas cum-  
pras d'aur en cas d'in gea a l'iniziativa.

## **La credibilitad sa sminuiss**

La Banca naziunala possedia da pre-  
schent 7,3 pertschient da sias activas en  
furma d'aur, ha ditg la ministra da fi-  
nanzas *Eveline Widmer-Schlumpf*. En  
cas d'in gea stuess la banca acquistar  
aur per 63 milliardas. Las reservas na  
dastgass ella betg pli vender. Quai smi-  
nuiss la credibilitad da la Banca naziu-  
nala che na pudess betg pli ademplier  
sias incumbensas.